

史藁

列傳第七十九

光祿大夫

經筵講官明史總裁戶部尚書加七級

臣

王鴻緒

敕編撰

廖紀

王憲

周期雍

唐龍

王杲

王

瞻

周用

宋

景

聞淵

范總

王邦瑞

劉訥

孫應奎

聶豹

李默

萬

鏜

周延

潘

恩

賈應春

張永明

胡松

趙炳然

廖紀字時陳東光人舉弘治三年進士授考功主事屢遷文選郎中正德中歷工部右侍郎提督易州山廠羨金無所私

籍於官遷吏部左右侍郎世宗立拜南京吏部尚書調兵部
參贊機務被論解職嘉靖二年大禮議既定吏部尚書楊旦
赴召道劾張璁桂萼奸邪璁萼之黨陳洸遂劾旦而薦紀帝
卽罷旦以紀代之紀疏辭言臣年已七十精力不如喬宇聰
明不如楊旦帝優詔不許時宇旦方爲帝所惡而紀顧稱之
時論以此多紀光祿署丞何淵請建世室祀興獻帝下廷議
紀等執不可帝弗從紀力諍曰淵所言干君臣之分亂昭穆
之倫蔑祖宗之制臣謹昧死請罷勿議不納會廷臣多諍者
議竟寢已條奏三事其末言人材當惜謂正德之季宗社幾
危議者但知平定逆藩之功而不知保護京師之力自陛下
繼統老成接踵去新進連茹登以出位喜事爲賢以凌分犯

禮爲貴數年之間人才漸不足用伏望陛下於昔年致仕大臣念其保護之勲量行召用其他降職除名遣戍者使得以才自效帝但納其正士風重守令二事而已三邊總督楊一清召還內閣璵等欲起王瓊紀推彭澤王守仁帝不允復以鄧璋王憲名上竟用憲紀因言臣所推皆人望而席書謂臣內順相臣外制臺諫夫推用人才臣部職也今舉朝所不敢言不敢爲者書率攘臂言之爲之其才過臣遠甚請罷臣而用書帝慰諭紀五年正月御史張袞喻茂堅朱實昌以世廟禮成請宥議禮得罪諸臣璵亦以爲請章俱下吏部紀等列上四十七人卒報罷御史魏有本以劾郭勛救馬永謫官給事中沈漢等論救帝不聽紀從容爲言且薦永及楊銳帝

納之有本得無謫紀在南都持議與璉合坐是劾罷璉輩引助已而紀自以先達示不附麗間與牴牾璉輩亦不喜因年老數稱病乞歸許之去初獻皇實錄成加太子太保至是進少保賜敕乘傳夫廩視故事有加卒贈太保謚僖靖

王憲字維綱東平人弘治三年進士歷知阜平滑二縣召拜御史正德初擢大理寺丞遷右僉都御史清理甘肅屯田進右副都御史巡撫遼東歷鄖陽大同以應州禦寇功廕錦衣世百戶遷戶部右侍郎改撫陝西入爲兵部右侍郎近畿盜起偕太監張忠都督朱泰捕之復以功廕錦衣武宗南征命率戶兵工三部郎各一人督理軍儲頗附權倖駕旋以中旨代王瓊爲兵部尚書世宗卽位爲給事中史道劾罷嘉靖

年廷推鄧璋及憲爲三邊總制言官持不可帝竟用憲部將
王宰史經連敗寇璽書褒諭吉囊數萬騎渡河從石臼墩深
入憲督總兵官鄭卿杭雄趙瑛等分據要害擊之都指揮卜
雲斷其歸路寇至青羊嶺大敗去斬首三百餘級獲馬駝器
仗無算帝大喜加憲太子太保復予一子廕至是凡三廕錦
衣世百戶矣中官織花絨於陝憲請罷之又因九廟成請釋
還議禮得罪者頗爲士大夫所稱張璁桂萼欲用王瓊爲總
制乃改憲南京兵部尚書已入爲左都御史朔州告急廷推
憲總督宣大憲不肯行曰我甫入中臺何見驅亟也給事中
夏言趙廷瑞劾憲託疾避難復罷歸未幾帝追念憲召爲兵
部尚書小王子入寇條上平戎及諸邊防禦事宜又請立京

營分伍操練法諸將不得藉內府供事規避營操帝皆嘉納舊制軍功論敘有生擒斬首當先殿後奇功頭功諸等其後濫冒日多憲定軍功襲替格自永樂至正德酌其輕重大小之差臚析以上詔著之會典爲成式尋兼督團營西番諸國來貢稱王號者百餘人憲與禮臣夏言等請如成化弘治間例荅敕止國王一人仍限貢期人數議乃定大同兵變憲初言首亂當誅餘宜散遣而大學士張孚敬與總督劉源清力主用兵憲乃不敢堅前議源清攻城不能下北寇又內侵請別遣大臣禦北寇已得專攻城憲亦議從其奏論者多尤憲會帝悟大同重鎮不宜破壞乃寢其事亂亦旋定源清竟得罪去居數年憲引年歸卒贈少保諡康毅子汝孝副都御史

見丁汝夔傳

周期雍字汝和江西寧州人正德三年進士授南京御史劉瑾既誅爲瑾斥者悉起而給事中李光翰任惠徐蕃牧相徐暹趙士賢御史貢安甫史良佐曹閔王弘葛浩姚學禮張鳴鳳王良臣徐鉅趙佑楊璋朱廷聲劉玉部郎李夢陽王綸孫磐等以兼劾羣閹未得錄期雍偕同官王佩力請皆召用兵部尚書王敞附瑾進期雍請斥之焦芳劉宇猶在列而劉大夏韓文楊守隨林瀚張敷華未雪期雍皆極論陳金討江西賊縱苗殺掠期雍發其狀尋清軍廣東劾鎮守武定侯郭勛金與勛皆被責出爲福建僉事宸濠反簡銳卒赴討會賊平乃還嘉靖初爲浙江參議討平溫處礦盜予一子官再遷湖

廣按察使擢右僉都御史巡撫順天薊州密雲關堡數十以避寇警盡移入內地寇騎益長驅期雍悉修復之數列上便宜入爲大理卿歷刑部左右侍郎右都御史拜刑部尚書大計京官言官劾期雍納賄吏部白其誣詔爲飭言者郭勛修前卻明年風霾勸帝罷免大臣期雍遂去位家居十年卒

唐龍字虞佐蘭谿人受業於同縣章懋登正德三年進士除郟城知縣禦大盜劉六數敗之加俸二等父喪服除徵授御史出按雲南錢寧義父參將盧和坐罪當死寧爲奏辨下鎮撫覆勘會遣官錄囚受寧屬欲出和爲龍所持卒正其罪土官鳳朝明坐罪死革世職寧令滇人爲保舉而矯旨許之龍抗疏爭寢其事再按江西疏趣張忠許泰班師三司官從宸

漢叛者猶居位龍召數之曰脅從罔治謂凡民耳若輩讀書
食祿何醜顏乃爾立收其印綬擢陝西提學副使遷山西按
察使召爲太僕卿嘉靖七年改右僉都御史總督漕運兼巡
撫鳳陽諸府奏寬淮西官馬種牛罷壽州正陽關樵稅通秦
二州虛田租及漕卒船料民甚德之召拜左副都御史歷吏
部左右侍郎陝西方大饑吉囊擁衆臨邊延綏告警詔進龍
兵部尚書總制三邊軍務兼理賑濟齎帑金三十萬以行龍
奏行採荒十四事時吉囊居套中西抵賀蘭山限以黃河不
得渡用牛皮爲渾脫渡入山後俺荅亦自豐州入套爲患龍
用總兵官王效梁震數敗敵屢被獎賚召爲刑部尚書大猾
劉東山構修建昌侯張延齡興大獄延齡昭聖皇太后弟帝

所惡也人莫敢直更坐獄不窮竟去者數十人龍獨執正東
山罪大禮大獄及諸建言獲罪者廷臣屢請寬不能得會九
廟成覃恩龍錄上充軍應赦者百四十人率得宥所不原惟
豐熙楊愼王元正馬錄呂經馮恩劉濟邵經邦而已考尚書
六年滿加太子少保以母老乞歸侍養久之用薦起南京刑
部尚書就改吏部兵部尚書戴金罷召龍代之疏起諸廢將
伯爵張鳳李朝陽等太廟成加太子太保尋代熊浹爲吏部
尚書龍有才居官著勞績及爲吏部每事諮僚佐年老多疾
輒爲所欺御史陳九德劾前選郎高簡罔上行私并論龍衰
乃下簡詔獄龍引疾未報吏科楊上林徐良輔復論簡三
杖簡六十充軍上林良輔以不早言罷職龍黜爲民龍已

有疾輿出國門卒後數年子修撰汝楫疏辨詔復官贈少保
諡文襄龍故與嚴嵩善龍之罷實夏言主之而汝楫素諂事
嵩得第一人及第官至左諭德後坐嵩黨奪官

王果字景初汝上人正德九年進士授臨汾知縣擢御史巡
視陝西茶馬帝遣中官分守蘭靖果言窮邊飢歲不宜設官
累民不報嘉靖三年帝將遣中官督織造於蘇杭果疏諫不
納久之擢太僕少卿改大理再遷左副都御史進戶部右侍
郎河南大饑命果往賑果請急發帑金詔齎臨清倉銀五萬
兩以行既至復請發十五萬兩至活不可勝計事竣賜銀幣
尋以右都御史總督漕運故事繕運艘軍三民七總兵官顧
璘以軍民困敝請發兩淮餘鹽銀七十萬戶部尚書李如圭

不可果請改折兩年漕運十之三以所省轉輸費治運艘勿
重困軍民報可踰年入爲戶部尚書后父安平侯方銳乞張
家莊馬房地果言此地三千餘頃正供所出不可許宜以大
慈恩寺入官地二十頃予之帝從其議特國儲告匱諸邊請
增餉無虛月四方多水旱給事中李文進請議廣儲蓄果列
九事以獻已又上制財用十事帝咸納之舊制歲漕四百萬
石果以果有餘而用不足遇災傷率改折以便民一日帝見
改折者過半大驚以詰戶部果等引罪敕自今務遵祖制毋
輕變果掌邦計事無不辦帝深倚之後有謠言龍涎香久不
進帝以此不悅給事中馬錫勑果及巡倉御史艾朴受賄給
事中厲汝進言倉場尚書王暉亦然竝下獄果朴遣戍暉斥

爲民杲竟卒於雷州戍所隆慶初給事中辛自修等訟杲冤
詔復官賜祭葬贈太子太保暉句容人由進士除吉安推官
從王守仁平宸濠遷大理寺副爭大禮下獄廷杖累遷右副
都御史巡撫江西歷兩京戶部侍郎出督漕運進尚書歷官
著清操

周用字行之吳江人弘治十五年進士授行人正德初擢南
京兵科給事中父憂服闋留補禮科已乞南仍改南京兵科
諫迎佛烏斯藏及以中旨遷黜尚書都給事中等官且請治
鎮守江西中官黎安罪時多其直出爲廣東參議預平番禺
盜有功歷浙江山東副使擢福建按察使改河南右布政使
代監司鞫南陽滯獄獄爲之空嘉靖八年擢右副都御史巡

撫南贛召協理院事歷吏部左右侍郎以起廢不當尚書汪
鋐委罪僚屬乃調用南京刑部就遷右都御史工刑二部尚
書九廟災自陳致仕用端亮有節槩旣罷中外皆惜之頻有
推薦久之以工部尚書起督河道數月改漕運未上召拜左
都御史二品九年滿加太子少保代唐龍爲吏部尚書卒贈
太子太保諡恭肅曾孫宗建自有傳用掌憲時愼自持而已
無所獻替其後宋景屠僑繼之大略皆廉潔與用相似景未
久卒而僑居職八年屬嚴嵩柄政風紀不振議丁汝夔獄受
杖不能去景字以賢奉新人弘治末進士知睢州正德五年
入爲河南道御史故事知州無改御史者劉瑾創之也瑾誅
景引疾去嘉靖三年以薦補浙江僉事進山西副使民飢爲

盜殺守禦指揮景樹幟令被脅者赴之賊咸歸命乃擒斬其魁四遷山西左布政使累官南京吏工二部尚書改兵部參贊機務入爲左都御史卒贈太子少保吏部尚書諡莊靖僑字安卿吏部尚書瀟再從子也登正德六年進士授御史巡視居庸諸關武宗遣中官李嵩等捕虎豹僑力言不可世宗時數歷中外歷左都御史卒贈少保諡簡肅

聞淵字靜中鄞人弘治十八年進士初授禮部主事已改刑部楊一清爲吏部調淵稽勲員外郎歷考功郎中改掌文選遷南京右通政嘉靖初擢應天府尹改尹順天累遷南京兵部右侍郎攝部事薦馬永等十餘人名爲刑部右侍郎遷左進南京刑部尚書就移吏部名爲刑部尚書周用卒代爲吏

部尚書侍郎徐階得帝眷前尚書率推讓之淵自以前輩事
取獨斷大學士夏言柄政淵老臣不能委曲徇及後議言獄
淵謂言事祇任意跡涉要君請帝自裁決帝大怒切責淵嚴
嵩旣殺言勢益橫部權無不侵數以小故奪淵俸淵年七十
矣遂乞骸骨歸家居十四年卒先累加太子太保卒贈少保
諡莊簡淵居官始終一節晚扼權相功名頗損在南刑部時
張璁桂萼先爲曹屬嘗題詩於壁遣人屬淵勒石後堂淵曰
此尚書堂也吾敢以相君故爲郎官勒石卒不許

范鏞字平甫其先江西樂平人遷瀋陽鏞舉正德十二年進
士授工部主事遷員外郎嘉靖三年伏闕爭大禮下獄廷杖
由戶部郎中改長蘆鹽運司同知遷河南知府歲大飢巡撫

都御史潘墳駁諸請賑文牒候勘實乃發總不待報輒開倉賑之全活十餘萬民爭謳頌總語聞禁中帝爲責戶部及墳與巡按御史匿災狀墳歸罪總以自解被劾罷去總名由此顯遷兩淮鹽運使條上鹺政十要歷四川參政湖廣按察使浙江河南右左布政使二十年擢右副都御史巡撫寧夏總爲人持重有方略旣蒞重鎮不上首功一意練步騎廣儲蓄繕治關隘亭障寇爲遠徙俘歸者五百人上疏言邊將各有常祿無給田之制自武定侯郭勛奏以軍餘開墾田園給將領委奸軍爲莊頭害殊大宜給還軍民任耕種便帝從其請居數年引疾歸起故官撫河南尋召爲兵部右侍郎轉左尚書王以旂出督三邊總署部事項之奉詔總理邊關阨隘奏